

# Jomboy tongi

1935-yil 1-apreldan chiqib boradi

2021-yil 15-yanvar, juma, 2 (5862)



**Баҳрон ДАВРОНОВ, истеъ-  
фодаги полковник:**

– Ҳарбий сифатида фаолият бошлаганимга 43 йил тўляпти. Ўтган йиллар давомида Қорақум саҳросидан, Урал ҳавзасигача бўлган минтақаларда хизмат қилдим. Мустақиллик йиллари Термиз, Фарғона, Жиззах горни-зонларида ишлаш насиб этди.

Ҳамиша танлаган касбимдан фахрланганман. Меҳнатларим қадр топди, “Шуҳрат” медали билан тақдирландим. Фарзандларим ортимдан эргашиб, ҳарбий бўлди.

Бир нарсага имоним комил: Ватанни ҳимоя қилишдан муҳимроқ бурч бўлмайди.

**Соҳиб САЙФУЛЛАЕВ**  
олган сурат.

## МАҲАЛЛА ХАБАРЛАРИ

Тут маҳалласида табиий газ босими пасайиб кетди. Вазиятни яхшилаш бўйича аҳолидан кўплаб мурожаатлар келиб тушяпти.

Юқори тут қишлоғининг 300 метр ички йўли тамиртаълаб аҳволга келган. Ушбу муаммо йўл харитасига киритилди.

Ўрнатилганига элик йилдан ошган 100 дан ортиқ симёғоч ярқисиз аҳволга келган.

**Жамол НАСИМОВ.**

\*\*\*

Нўш маҳалласида беш нафар хотин-қизлар бандлиги таъминланди. “Ёшлар дафтари” га киритилган фуқаро мактабгача таълим муассасасига ишга жойлаштирилди.

Нўш қишлоғининг 300 метр йўлига тош қоплама ётқизилиб, жорий таъмирланди.

Нўш-4 қишлоғига аҳоли томонидан янги трансформатор ўрнатилди.

Ижтимоий кўмакка муҳтож 11 нафар оилага қаттиқ ёқилги маҳсулоти тарқатилди.

**Мархабо ШОМУРОДОВА.**

\*\*\*

Наймантепа маҳалласида шу йилнинг биринчи чорагида 5 километр ички йўлни таъмирлаш, 270 туп дарахтга шакл бериш ва маҳалла ҳудудини ободонлаштириш режалаштирилди.

Суюлтирилган газ баллони йўқ ўн оила рўйхатга олинган. Бештасига газ баллон берилди.

Уюлмаган ёшларнинг 11 нафари ишга жойлаштирилди. 23 нафар оила янги йил ҳисобидан “Темир дафтар” га киритилди.

**Ниёзхон ХИДИРОВА.**

## ТУМАН КЕНГАШИ СЕССИЯСИ

Халқ депутатлари туман кенгашининг навбатдаги – XXI сессияси ўтказилди. Тадбирни кенгаш раиси Қаюм Собиров олиб борди.

Кун тартибида Ўзбекистон Республикаси Президенти Шавкат Мирзиёевнинг 2020 йил 29 декабрь куни Олий Мажлисга йўллаган Мурожаатномаси мазмун-моҳияти, унда белгиланган устувор вазифалардан келиб чиққан ҳолда ҳудудий дастурларни тайёрлаш тўғрисидаги масала кўриб чиқилди.

Сессияда иштирок этган Олий Мажлиси Сенатининг Му-дофаа ва хавфсизлик масалалари кўмитаси аъзоси Ф.Боқиев

сўзга чиқиб, Президент Мурожаатномасида сўз юритилган, давлатимиз раҳбари томонидан қуйи тизим мутасаддиларига белгилаб берилган вазифалар бўйича тушунча берди.

Шунингдек, 2021 йил учун туманда режалаштирилган қишлоқ хўжалигига доир лойиҳаларни амалга ошириш ва ривожлантириш чора-тадбирлари муҳокама этилди. Ушбу масала юзасидан Қонунчилик палатаси спикери ўринбосари Ақтам Ҳайитов сўзга чиқди.

Кун тартибидаги масалалар юзасидан депутатлар ўз мулоҳазаларини билдиришди. Сессия тегишли қарор лойиҳаларини қабул қилди.

## Мурожаатнома ёшларга янги умид берди

Келажак авлод камолотини таъминлаш давлатимизда устувор вазифага айланган. Эътиборлиси, Президентимизнинг 2020 йил 29 декабрда Олий Мажлисга йўллаган Мурожаатномасида ҳам мазкур масалага алоҳида урғу берилди.

2021 йилга “Ёшларни қўллаб-қувватлаш ва аҳоли саломатлигини мустаҳкамлаш йили”, деб ном берилиши ёшларга бўлган эътиборнинг яққол намунасидир. Ўзбекистон демографик нуқтаи назардан ёш мамлакат эканлиги ва аҳолининг 65 фоизини 35 ёшгача бўлганлар ташкил қилишини ҳисобга олсак, бу – яхши ва пухта ўйланган ташаббус эканлигига амин бўлаемиз.

Шунингдек, Мурожаатномада ёшлар сиёсатига доир истиқболдаги марралар белгиланди. Хусусан, олий таълимга ажратиладиган давлат грантлари сони 25 фоизга оширилиши, эҳтиёжманд оила қизлари учун грантлар сонини 2 мингтага етказиш, аъло баҳоларга ўқиётган, ижтимоий ҳимояга муҳтож қизлар учун махсус стипендиялар жорий этиш каби та-

шаббуслар фикримиз тасдиғидир.

Президентимиз томонидан илгари сурилаган ташаббусларга ҳамоҳанг тарзда “Юксалиш” умуммиллий ҳаракати томонидан ёшларнинг жамиятда ўз ўрнини топиши, ҳуқуқий онги ва соғлом маънавий дунё-қарашини оширишга қаратилган қатор тадбирлар ўтказилиб келиняпти. Хусусан, ўтган йилда турли социологик тадқиқотлар, меҳрибонлик уйи тарбияланувчилари билан учрашувлар, “Келажакка назар” мавзuida мотивацион мулоқотлар, “Ёшлар парламенти” аъзолари билан янги ҳуқуқий ҳужжатларни мазмун-моҳиятини ўрганишга қаратилган тадбирлар шу жумладандир.

Жорий йил учун белгиланган режаларимиз ҳам кўп. Бу борада Мурожаатноманинг мазмун-моҳиятини ёшларга етказиш асосий ишларимиз сирасида турибди.

**Абдуғаффор АБДУРАҲМОНОВ,**  
“Юксалиш” умуммиллий ҳаракати Жиззах вилояти ҳудудий бўлини маси координатори.

## Жомбойга 10 та ноутбук ва 2 мингта китоб ажратилади

Президент Администрацияси, Ёшлар ишлари агентлиги ва бошқа мутасадди идора вакиллари билан иборат ишчи гуруҳ аъзолари Жомбой ёшлари билан учрашув ўтказди.

“Ўзбекистон ёшлари форуми” да давлатимиз раҳбари томонидан ёшларни ҳар томонлама қўллаб-қувватлаш ва уларнинг эзгу интилишларини рўёбга чиқаришга қаратилган маърузаларининг мазмун-моҳияти тадбирнинг бош мавзуси бўлди.

Шунингдек, учрашув давомида ўқувчи-ёшларнинг мурожаат ва таклифлари муҳокама этилди. Уларга йўл-йўриқ, тавсия ва кўрсатмалар берилди. Мурожаатларнинг аксарияти жойида ечим топган бўлса, айримларини қонуний кўриб чиқиш учун чора-тадбирлар белгиланди.

Тадбирда ёшлар ишлари агентлиги туман бўлими таклифига мувофиқ жомбойлик ўқувчилар учун 2 мингта бадий асарлар тўплами ҳамда 10 та нутбук ажратилиши ваъда қилинди.

Мулоқотда Ёшлар ишлари агентлиги директори Алишер Саъдуллаев ҳамда туман ҳокими Қаюм Собиров қатнашди.

МУАММО, ХАБАР,  
ТАШАББУС

Кўкгумбаз маҳалласида 2-сектор раҳбари Ж.Аҳмедов спортчи ёшлар билан учрашди. Тадбирда жисмоний тарбия ва спортнинг инсон камолотидаги ўрни ҳақида сўз юритилди.

Тадбир давомида стол тенниси бўйича 2020 йилнинг ноябрь ойида ўтказилган Ўзбекистон чемпионатида 1-ўринни эгаллаган Ж.Абдуалимова ҳамда Н.Тошбоева халқаро стандартдаги ракетка ва махсус диплом билан тақдирланди.

4-сектор раҳбари Ш.Азаматов Ширинкент маҳалласида истиқомат қилувчи уруш фахрийси Салим Исроилов хонадониди бўлди. Собиқ жангчи билан ўтган суҳбат давомида тинчлик, бугунги осуда ҳаёт қадри ҳақида фикр билдирилди. Шунингдек, Бешбола маҳалласи, Нурубод қишлоғида яшаб ўтган Рашид Қаримов оиласи ҳолидан хабар олинди. Озиқ-овқат маҳсулотлари ҳамда байрам совғалари топширилди.

48-умумтаълим мактабида 4-сектор раҳбари Ш.Азаматов ҳудуд ёшлари билан учрашиб, уларнинг муаммоларига қулоқ тутди. Давлат хавфсизлик хизмати Жомбой туманлараро бўлинмаси мутасаддилари иштирок этган тадбирда Қорамўйин маҳалласида истиқомат қилувчи 30 нафардан ортиқ ёшларнинг муаммо ва тақлифлари муҳокама этилди.

Ёшлар муаммоларини аниқлашга қаратилган навбатдаги қабул Саришма маҳалласида ўтди. Давлат хавфсизлик хизмати билан ҳамкорликда ташкил этилган тадбирда ҳудудда истиқомат қилувчи 20 нафардан ортиқ ёшлар иштирок этиб, ўзларини қийнаб келаётган муаммолар юзасидан масъулларга мурожаат этишди.

Тадбир аввалида тадбиркорлик билан шуғулланувчи ёки фаолиятини энди йўлга қўймоқчи бўлган ташаббускор ёшлар учун кредит, субсидия, преференция имтиёзлари ҳақида батафсил тушунча берилди. Шунингдек, иштирокчиларнинг ишга жойлашиш, олий таълим муассаларига ўқишга кириш, тендер савдоларида қатнашиш мавзуларидаги саволларига соҳа мутахассислари атрофлича жавоб қайтаришди.

Туман ҳокими Булунғур туманида жойлашган Н-ҳарбий қисмда бўлиб, хизматчиларни касб байрами билан табриклади.

– Мамлакатнинг жаҳон ҳамжамиятида ўз ўрнига эга бўлиши, турли таҳдидларга қарши курашиш салоҳияти профессионал армия билан ўлчаниши сир эмас, – деди ҳоким. – Бу борада Ўзбекистон минтақадаги нуфузли давлатлардан саналади. Юртбошимиз бошлаган очиқлик ва миллий манфаатларни ўзаро ҳисобга олиш тамойилига асосланган янги сиёсатни бугун яқин ва узоқ хориж мамлакатлари эътироф этаётгани бежиз эмас.

Тадбир давомида офицер ва сержантлар эсдалик совғалари билан тақдирланди.

Туман ҳокимлиги ахборот хизмати.

Ҳоким: Уларнинг  
ҳаёт йўли ибратдир

Қуролли Кучларимиз ташкил этилганининг 29 йиллиги ҳамда Ватан ҳимоячилари куни муносабати билан туманимизда ҳарбий ватанпарварлик фестивали ўтказилди.

“Ким Ватанга содиқ бўлса, мендирман ўша!” шиори остида ташкил этилган тадбирда Марказий ҳарбий округ Самарқанд гарнизони хизматчилари, миллий гвардия, ички ишлар, фавқулодда вазиятлар бошқармалари ҳамда тизимга алоқадор мутасадди ташкилот вакиллари қатнашди.

Дастлаб “JV MAN” автомобиль заводидан туман марказий стадионига қадар масофада ҳарбий парад бўлиб ўтди.

Қайд этиш жоизки, бундай тадбирлар ёшлар қалбида Ватанга муҳаббат, юрт тинчлиги ва осуда ҳаётимизга шукрона туйғуларини шакллантиришда муҳим аҳамиятга эга. Буни парадда қатнашган иштирокчилар кўзларидаги ёлқиндан ҳам англаш қийин эмас. Айниқса, давлатимиз мадҳияси садолари остида намоёиш этилган ҳарбий техника ва қурол-аслаҳалар кўргазмаси, ҳарбий хизматчиларнинг жанговар чиқишлари томошабинларга ўзгача кайфият улашди.

Тадбирда туман ҳокими Қаяом Собиров қатнашди ва сўзга чиқди.

– Ватан ҳимояси деганда Широқ, Жалолиддин Мангуберди, Нажмиддин Куб-

ро, Амир Темур, Заҳириддин Муҳаммад Бобур каби буюк аجدодларимиз сиймоси кўз олдимизда намоён бўлади, – деди ҳоким. – Улардан ўтиб келаётган ворисий туйғулар Қуролли Кучларимиз сафида хизмат қилаётган мард ва жасур ўғлонлар қонида оқаётганига ишончимиз қомил.

Шунингдек, туман ҳокими Ватанимиз тинчлиги, сарҳадларимиз дахлсизлигини сақлаш йўлида ҳалок бўлган Жомбой фарзандлари – Муроджон Тожиёв, Норбек Қодиров, Келдиёр Холматов ҳамда Шухрат Жумановнинг пок хотирасини ёдга олди.

– Улар босиб ўтган умр йўли, кўрсатган жасоратлари фарзандларимиз учун ибратдир, – деди Қ.Собиров.

Шундан сўнг Самарқанд гарнизони қошидаги маънавият ва маърифат маркази ҳарбий оркестр жамоасининг чиқишлари намоёиш этилди. Туман маданият бўлими хонандалари томонидан тайёрланган бадиий қисм кўнгиларни хушнуд этди.

Мутасаддилар хизмат бурчини адо этиш чоғида ҳалок бўлган фидойи хизматчилар хонадониди бўлиб, уларнинг оила аъзолари ҳолидан хабар олишди. Қахрамон ҳарбийларнинг фарзандларига байрам совғалари топширилди.

Гулшода ҲУСНИДДИНОВА.

## ДТМ билан ҳамкорлик ўрнатилди



мунтазам ташкил қилиш, ўқувчи билимини олдиндан прогноزلаш орқали йўналтириш масалаларида фикр алмашилди.

Учрашувда тажрибали ўқитувчи ҳамда битирувчи синф ўқувчиларининг ота-оналари иштирок этди.

Шухрат РАҲМОНОВ,

Халқ таълими бўлими бош инспектор-методисти.

СУД  
ТИЗИМИДА ЯНГИ  
БОСҚИЧ БОШЛАНДИ

Мамлакатнинг демократик тамойилларга содиқлиги аввало, суд тизимини демократлаштиришда кўринади. Қачонки суд ҳокимияти мустақил бўлса, жамиятда ўсиш бўлади. Аҳолининг судьяларга ишончи ортади.

Мамлакатимизда сўнги 2-3 йилда соҳани либераллаштириш, очиқлик, шаффоқлик, адолатлилик принципларини мустаҳкамлаш йўлида муҳим қадамлар ташланди. Жумладан, судлар кадрларни мустақил танлашнинг демократик ва шаффоқ механизмига

ўтди. Эътиборлиси, тизимда тарихий ислохотларни қатъият билан амалга оширишга киришилди. Эндиликда очиқ суд йиғилишлари оммавий ахборот воситаларида эркин ёритилиши мумкин. Яъни, суд тадбирларига журналист, блогер ҳамда кенг жамоатчилик иштироки эркиндир. Бир сўз билан айтганда, барча учун суд эшиклари очилди.

Жойларда суд раислари ва фуқаролар ўртасида сайёр қабуллар ўтказилаётгани ҳам тизимдаги ўзгаришлардан далолат.

Навбахор ТУРСУНОВА,  
Жомбой туманлараро иқтисодий суди раиси.



\* БМТ бош котиби Антониу Гутерриш иккинчи муддатга қайта сайланишга розилик берди. Бу ҳақда унинг матбуот котиби Стефан Дюжаррик брифингга маълум қилди. Антониу Гутерриш номзоди Хавфсизлик Кенгашининг тавсиясига биноан 2016 йил 13 октябрда овоз беришларсиз БМТ Бош Ассамблеяси томонидан маъқулланиб, 2017 йил 1 январдан ўз лавозимига киришган эди.

\* Москвада Арманистон бош вазири Никол Пашинян, Озарбойжон президенти Илҳом Алиев ва Россия раҳбари Владимир Путин иштирокида уч томонлама учрашув ўтказилди. Унда 44 кун давом этган Қорабоғдаги «аср уруши»дан кейинги ҳолат муҳокама қилинди.

Учрашувнинг 5 дақиқадан кўпроғи ОАВ учун очик бўлди ва кейинчалик барчаси ёпиқ эшикларда давом эттирилди. Путин, Пашинян ва Алиев тўрт соатга яқин музокара олиб борган.

\* Ҳорун Яхё исми билан танилган 64 ёшли Аднан Октав Истанбул суди томонидан 1075 йил ва 3 ойлик қамоқ жазосига ҳукм қилинди.

\* Молдованинг янги президенти Майя Санду илк расмий сафарини Украинага амалга оширди. Эътиборлиси, Санду тежамкорлик нуқтайи назаридан илк хорижий сафарига самолётда эмас, балки автомобилда йўл олишни маъқул топган.

\* Қирғизистоннинг янги, ҳисоб бўйича олтинчи президенти 52 ёшли Садир Жапаров бўлди. У ўтган йил октябрда рўй берган намоёишлардан кейин ўтказилиши белгиланган муддатидан олдинги президентлик сайловларида ғолиб чиқди.

\* АҚШ касаллик юқтиришлар сони ўсиши бўйича дунёда биринчи ўринда: бу ерда ўтган ҳафтада 1 млн 786 мингдан ортиқ кишида коронавирус аниқланган. Жаҳон соғлиқни сақлаш ташкилоти коронавирус юқтириш ҳолатлари сони рекорд даражада ўсишини қайд этди: ўтган ҳафтада 5 миллионга яқин янги ҳолатлар аниқлади.

\* Италияда мафия иши бўйича 30 йил ичидаги энг йирик суд жараёни бошланди. Айбланувчилар уч соат давомида ўқиб эшиттирилди.

\* Кейинги 80 йил ичидаги энг кучли қор ёғиши сабабли Мадридда хатарнинг қизил даражаси эълон қилинди. Қорнинг баландлиги 60 сантиметрга етганлиги айтилмоқда.

\* Лондонда фавқулодда ҳолат эълон қилинди. Шаҳарнинг ҳар ўттизинчи фуқароси коронавирус юқтирган.

\* Брюсселда қора танли муҳожирнинг ўлимига қарши тартибсизликлар чоғида 100 дан ортиқ киши ҳибсга олинди.

\* Россия президенти Владимир Путин ҳукумат аъзолари билан йиғилишда кейинги ҳафтадан аҳолини катта кўламли эмлашдан оммавий эмлашга ўтиш ва бунинг учун зарур инфратузилмани шай ҳолатга келтириш вазифасини топширди.

Интернет ва ОАВ хабарлари асосида тайёрланди.

# Ким айбдор: Сув бермаган “Мирзапай”ми, талаб қилмаган фермер?

**Халқимизда “Чилла суви – тил-Хла суви” деган нақл бежиз ай-тилмаган. Экинга шу кунларда берилган сувнинг фойдаси катта. Айниқса, ғалла, узум, олма ва бошқа мева кўчатлари суғорилса, ер тўйинади. Шу орқали экинни ёзги қурғоқчиликдан асраб қолиш мумкин.**

– Туманимизда 863 та сув истеъмолчилари мавжуд бўлиб, 795 таси фермер ва деҳқон хўжаликлари ҳиссасига тўғри келади, – дейди туман сув истеъмолчилар уюшмаси ижрочи директори Шерзод Салимов. – Аммо фақат 280 нафари биз билан шартнома тузган, холос. Шартнома шартларига кўра, фермер талабнома билан чиқади, уюшмамиз белгиланган ҳажмда сув етказиб беради. Олайлик, ғалла йил давомида тўрт бора суғорилади. Жараён учун ўртача, 3100 куб сув сарфланади. Шундай бўлсада, сарф ҳажми ер майдони хусусиятига ҳам боғлиқ. Яъни, сув сатҳи яқин

худудлар 2-3 марта суғорилиши кифоя. Хўжалик сув солиғини шунга яраша тўлайди.

Ш.Салимовнинг таъкидлашича, кўпчилик фермерлар чилла вақти сув талаби билан мурожаат қилмайди. Ўз-ўзидан экинлар мавсумнинг муҳим агротехник тадбири бўлган чилла сувидан маҳрум бўлади. Бу ҳосилга салбий таъсир қилиши тайин.

Сувдан рухсатсиз, хўжасизларча ноқонуний фойдаланиш учун эса жавобгарлик бор – энг кам ойлик иш ҳақининг беш баробари миқдориди.

Айни кунларда уюшма томонидан мавжуд 1080 километр ариқ-зовурларни тозалаш ишлари олиб борилмоқда.

## Ирригациянинг “оғриғи”

Демак, механизм шундай: Уюшма фермернинг талабини “Мирзапай” ирригация бошқармасига етказиши ва шу асосда сув ажратилади. Хўш, тақсимлаш тартиби қандай? Туман учун ажра-

тилган лимит миқдори қанча?

– Булунгур, Жомбой ҳамда Пайариқ туманларидаги 95 минг 431 гектар майдонни сув билан таъминлашга хизмат кўрсатамиз, – дейди “Мирзапай” ирригация бошқармаси бошлиғи ўринбосари Ихтиёр Эшимов. – Сув ресурси худудлардаги ер майдонларининг гектар ҳажмига қараб тақсимланади. Масалан, туманимизда 31 минг 600 гектар суғориладиган майдон мавжуд. Куз-қиш мавсуми учун 48 миллион метр-куб лимит белгиланган.

Ҳар бир соҳада оғриқли нукта бўлади. Жумладан, ирригацияда ҳам сув етиб бориши қийин худудлар мавжуд. Таъкидлашича, туманимизнинг Ботбот канали зонасида 2500, Оқтепа канали зонасида 860 гектар майдонга сув етказиш муаммо туғдиради. Ҳозирда ушбу худудларни сув билан таъминлаш учун тизимли ишлар олиб борилмоқда.

Жумладан, Ботбот каналининг 23

километрга чўзилган қисмини бетонлаш, ер майдонларини томчилатиб суғориш технологияси билан жиҳозлаш режалаштирилган. Оқтепа канали эса чиқинди ва бегона жисмлардан тозаланади.

## “Мирза ариқ” нега ёпилди?

Кўпчиликни қизиқтирган саволга тўхталасан. Чилла суви мавсумида “Мирза ариқ” нега ёпилади?

И.Эшимовнинг айтишича, бунда сув ўлчовчи ва тақсимловчи иншоотларни жорий таъмирлаш учун қулайлик яратиш мақсад қилинади. Аммо, оқим тўлиқ тўхтатилмайди. Истеъмолчилар уюшмаси таълабнома билан чиқса, талаб ҳажмида сув очилади. Айни вақтда “Мирза ариқ”даги оқим 11 кубни ташкил этмоқда. Шундан 2 кубни чилла суви учун ажратилган.

Ахрор ШАМСИЕВ,

“Жомбой тонги” муҳбири.



## Таълим муассасаларида

8-умумтаълим мактабида худуд ёшларида таркиб топган жамоалар ўртасида волейбол бўйича мусобақа ўтказилди. Тадбирда маҳаллада истиқомат қилувчи 30 ёшгача фуқаролар ўзаро беллашдилар.

Худди шундай тадбир 54-умумтаълим мактабида ҳам ташкил этилди. Жисмоний тарбия ва спорт бўлими ҳамкорлигида ўтган мусобақада ўқувчилар шахмат бўйича куч синашишди.

Маълумот учун, “Соғлом турмуш тарзини кенг татбиқ этиш ва оммавий спортни янада ривожлантириш чора-тадбирлари тўғрисида”ги Президент фармони ижросини таъминлаш мақсадида туманимизда “Спортни сев, спорт билан яша!” фестивали ўтказилмоқда.

17-умумтаълим мактабида Ватан ҳимоячилари кунига бағишланган тадбир ўтказилди. Юргимиз сарҳадларини ҳимоя қилиши йўлида жон фидо қилган Мурад Тожиевнинг хотираси ёдга олинди. “Бизнинг қахрамонимиз” мавзуида ўтказилган иншолар танловида ҳам ўқувчилар М.Тожиев фаолиятини тилга олишди. Қахрамон жангининг мактабга ўрнатилган буюсти хотирасини абадийлаштириш йўлида қилинган эзгу ишлардан бири бўлганлигини эътироф этишди.

Дилноза АБЗАМОВА.

5-умумтаълим мактабида “Ким Ватанга содиқ бўлса – мендирман ўша” шиори остида ҳарбий ватанпарварлик ойлиги ўтказилди. Шу муносабат билан ташкил этилган тадбирда ҳарбий соҳа вакиллари қатнашди. Қуроли Кучларимизни мустаҳкамлаш, салохиятли кадрлар тайёрлаш борасида қилинаётган ишлар юзасидан ўқувчиларга маълумот берилди. Ҳарбий

хизматчи Фарид Мавлонов ёшларни қизиқтирган кўплаб саволларга жавоб берди. “Санъат шайдолари” тўғраги аъзоларининг мусиқий чиқишлари ўзгача шуқуқ бағишлади.

Тўлаой ШАРОПОВА.

32-умумтаълим мактабида “Ватанга хизмат – муқаддас бурч” мавзуида давра суҳбати ўтказилди. Чақириққа қадар бошланғич тайёргарлик раҳбари Х.Ражабов юргимиздаги ҳарбий таълим муассасалари ҳақида ўқувчиларга тушунча берди. Ушбу соҳага қизиқувчи ёшлар учун видеоролик намойиш этилди. 7-синф ўқувчиларининг сахна кўриниши барчага байрамона кайфият улашди.

Фаррух АЛИБОЕВ.

49-умумтаълим мактабида ҳам Ватанпарварлик тадбири ўтказилди. Мудофаага кўмаклашувчи “Ватанпарвар” ташкилотининг туман бўлими курсантлари ўзларининг чиқишлари билан иштирок этишди.

ЧҚБТ фани ўқитувчиси Элнур Лапасов томонидан тузилган “Ёш гвардиячилар” жамоаси ҳарбий машқ ва ўйинларни намойиш қилишди.

Фаол иштирокчилар “Адолат” СДП туман кенгашининг ташаккурнома ва эсдалик совғалари билан тақдирланди.

Комила УМАРОВА.

## Табиий фан мутахассислари тажриба алмашди

Табиий фанлар ойлиги муносабати билан 20-умумтаълим мактабида кимё, биология, физика бўйича “Дарсларда лаборатория ва амалий машғулотларни қўллаш усуллари” мавзуида ўқув семинари ўтказилди.

Тадбирда тумандаги барча мактабларда фаолият юритаётган фан ўқитувчилари иштирок этди. Сабоҳат Шохназарованинг “Турли температурадаги сув аралаштирилганда иссиқлик миқдорини таққослаш”, Наргиза Ўринованинг “Кислород олиш ва унинг ҳоссалари билан танишиш”, Зебинисо Ўринованинг “Сўлак ва ошқозон ши-

расининг озиқ моддаларига таъсирини ўрганиш” мавзуларидаги дарс тақдиротлари юқори баҳоланди.

Семинар давомида соҳа мутахассислари ўқувчилар иштирокида лаборатория ва амалий машғулотлар ўтказилишига доир масалаларда тажриба алмашишди. Ёшларнинг фанга қизиқшини ошириш мақсадида турли мушоиралар, мўъжизавий кечалар, учрашувлар ўтказилиши режалаштирилиб, чора-тадбир белгиланди.

Нигора ХАЛИЛОВА,

Халқ таълими

бўлими методисти.

## Маиший жанрлар ижодий тафаккурни ўстиради

Тасвирий санъатнинг йўналишлари кўп. Пейсаж, натюрморт, миниатюра, портрет... Маиший жанрда яратилган асарлар эса уларни қайсидир маънода бирлаштиргани билан аҳамиятли.

Бундай асарлар голланд рассомлари ижодида кўп учрайди. Р.Чориев, Ғ.Абдурахмонов каби ўзбек рассомлари ҳам маиший жанрда баракали ижод қилишди. Уларда инсонларнинг турмуш-тарзи, атрофда юз бераётган воқеа-ҳодисалар, қахрамонлар ҳаёти яхлит қамраб олинади.

Рассом бирор воқеани тасвирлашдан аввал унинг ижтимоий аҳамиятини ҳам англаб етиши керак. Маълум даврни акс эттириш учун адабий манбалар, меъморчилик обидалари ва археологик топилмаларни ўрганиш талаб этилади. Тарихчиларнинг мавзуга оид фикрлари

тўпланади. Ана шундан сўнг рассом қўлига мўйқалам олиши мумкин.

Ўқувчининг ижодий, илмий ва мантикий тафаккурини ўстиришда ҳам маиший жанр муҳим ўрин тутаяди. Шу орқали фанни амалиёт билан боғлаш мумкин. Ўқувчи мустақил изланиб, масалага ойдинлик киритади. Яхлит воқеликни акс эттирувчи деталлар излайди.

Таълим тизимига PISA, TIMS каби Халқаро баҳолаш дастурлари кириб келмоқда. Боланинг мантикий тафаккурини биринчи ўринга қўядиган бу дастурлар дунё таълим тизими учун ҳам янгиликдир. Тасвирий санъат ва чизмачилик дарслари орқали замон талабига айланган ушбу мақсадга эришиш мумкин.

Дилафрўз ШАМСИЕВА,

48-умумтаълим

мактаби ўқитувчиси.

## ХАБАРЛАР, ЭЪЛОНЛАР, БИЛДИРИШЛАР

### БЕКОР ҚИЛИНАДИ

40-умумтаълим мактаби томонидан 2003-2004 ўқув йилида Ходжакулов Шавкат Хасанович номига берилган № 1103570 рақамли гувоҳнома йўқолгани сабабли бекор қилинади.

\*\*\*

46-умумтаълим мактаби томонидан 2018-2019 ўқув йилида Шералиев Ҳайрулла Шерали ўғли номига берилган № 0139722 рақамли гувоҳнома йўқолгани сабабли бекор қилинади.

\*\*\*

34-умумтаълим мактаби томонидан 1994-1995 ўқув йилида Нарзуллаев Самадхон Жамолович номига берилган АО № 102497 рақамли аттестат йўқолгани сабабли бекор қилинади.

\*\*\*

Давлат хизматлари маркази томонидан 11.02.2019 йилда 684671 рақами билан рўйхатга олинган “IMRONBEK MAISHIY XIZMATLARI” хусусий корхонасининг думалоқ муҳри ва бурчак тамғаси йўқолгани сабабли бекор қилинади.

\*\*\*

### ДАЪВОЛАР БЎЛСА

Мархум Рўзиев Валерий Иосифовичга (09.02.2020 йилда вафот этган) тегишли мол-мулк учун меърос иши очилмоқда. Меросхўрлар 1-сон нотариал идорасига мурожаат қилишлари сўралади.

\*\*\*

Мархум Бердимурод Маматмуродовга (27.12.2017 йилда вафот этган) тегишли мол-мулк учун меърос иши очилмоқда. Меросхўрлар 1-сон нотариал идорасига мурожаат қилишлари сўралади.

Манзил: Жомбой, Сарой кўчаси.

# Темурийлар тарихининг ўқилмаган саҳифалари

**Соҳибқирон Амир Темур Стахтига валиаҳд Пирмухаммад қолиб, суюкли набираси Ҳалил Султон ўтиришга муваффақ бўлади. Афсуски унинг ўзбошимчалик билан давлат тепасига келиши салтанат учун таназзулни бошлаб берди.**

Бу фожиа Ҳалил Султоннинг оддий канизак қизга кўнгил қўйиши билан бошланди. Онаси Хонзодабегим Сароймулкхонимга пинхона маслаҳат солади. Аммо тез орада сир ошкор бўлади. Бундан Амир Темур ҳам хабар топади. Бибихоним Шодимулк бегимнинг фарзанд кутаётганлигини айтгач, тавба-та-

заррулардан сўнг набираси авф этилади.

22 ёшли шахзода мамлакат тахтига ўтиргач, Шодимулк бегим ҳам давлат ишларига фаол аралашади. Ёш жувон давлат бошқаруви, хазина ва салтанат ишларига бутун борлиги билан енг шимариб киришади. Давлат ва раият тақдирини ҳал қилувчи лавозимни эгаллайди.

Ҳалил Султоннинг кўз ўнгида марҳум Соҳибқирон бобосининг канизакларини амирлару давлат бошқарувидаги обрўли инсонларга тортиқ қилишдан ҳам тап тортмайди. Унинг хуфиёна буйруғи билан Амир Темурнинг умр йўлдоши Тўкал оға бегим мажбуран Амир шайх Нуриддинга ни-

коҳлаб берилади. Ҳатто Сароймулкхоним ва Тўкалхонимни заҳарлаб ўлдиришдек машғум қотилликка қўл уради.

Салтанатдаги бундай мудҳишлик Соҳибқироннинг кичик ўғли, Хуросон ҳукмдори Шоҳрух Мирзони бефарқ қолдирмади. 1409 йилнинг айни баҳориди у Ҳалил Султонга қарши қўшин тортади. Натижада Амир Худойдод томонидан банди қилиниб, Самарқандга, сўнгра Фарғонага олиб кетилади. Шодимулк бегимни арқон билан боғлаб, устидан қора тўр парда ташланган ҳолда шаҳар бозорларида сазойи қилишади.

Аммо маккора аёл етти ухлаб тушида кўрмаган таҳқирлашу азоб-уқубатларга бардош беради ва Ҳалил Султондан нажот кутади. Айни пайтда шахзода ҳам тутқунликда эди. Муҳаббат кўзини кўр қилган Ҳалил Султон салтанат тахтидан ҳам кечигиша тайёр бўлади. Ёлғиз ўтинчи сифатида

Шодимулк бегимни қайтариб беришларини сўрайди.

Шоҳрух Мирзо шахзода Ҳалил Султонни Моварауннаҳр салтанатидан воз кечиш эвазига Рай вилоятига ҳоким қилиб тайинлайди. Шодимулк бегимни ҳам унга қайтаришади. Орадан кўп ўтмай Ҳалил Султонни хасталик енгиб, 27 ёшида ҳаёт билан видолашади. Умр йўлдоши ўлимни даҳшатли фожиа сифатида қабул қилган Шодимулк эса кўксига ханжар уриб, 24 ёшида ҳаётига нуқта қўяди.

Бирники-мингга, мингники-туманга, деганларидек хатолардан хулоса чиқармаслик катта фожиаларни бошлаб келиши бор гап. Эҳтимол, Ҳалил Султон фежиасини аввалдан сезгани учун Соҳибқирон келин танлашни давлат сиёсати даражасига кўтарган бўлса, ажаб эмас.

**Хидирали БОТИРОВ**  
тайёрлади.



**Қоровул: — Битта «баракатонкурнинг» буйруғи билан яшаш шароитимиз тенглашиб қолди, олапар...**


## Болаларга аталган тухфа

**И**жодкорнинг ўзи ҳис этмаган туйғулар ҳақида ёзиши қийин. Ҳиссиз ёзилган шеър эгасини дарров “сотиб қўяди”.

Тахририят эшигини қоқиб, шеърини машқларини олиб келадиган ёшлар кўп. Аксариятида ана шу кемтиклик бор. Ёши ва дунёқарашига ёд мавзуларни қофияга солади. Мактаб ўқувчиси ёзган бу сатрлардан болаликни тополмайси.

Мадианобону тахририятимиз қошида очилган “Парвоз” тўғарагининг фаол иштирокчиси. Дастлабки машқларидаёқ болаларча соддалик, беғуборлик сезилган эди. Яқинда ана шу машқлари тўплам ҳолида чоп этилибди.

Ёш ижодкорнинг “Мажнунтол” номли илк китоби бир жиҳати билан эътиборга молик. “Ғаройиб норин”, “Китоб ўқиган бола”, “Бобомнинг хийласи” каби ҳажвий асарларида у дунёни бола қалби билан идрок этади. Воқеалар қутилмаган ечим билан тугайди. Бир гал уйи ёнида ўсган мажнунтолнинг ғаройиб тузилишига ажабланиб, бувисини сўроққа тутади:



“— Був, сиз жавоб беринг!  
Эшитмайди ҳеч ойм.  
Айтинг, нега мажнунтол  
Бошин эгади доим?”

Мажнунтол ҳаммага салом бераётганлигини бувисидан билиб олгач, хайратланади. Дарахт ҳам овоз чиқариши мумкинлигини эшитиб, кўргиси келади. Ва ёнига бориб, салом беради. Аммо:

“Мени кўп жаҳлим чиқиб,  
Мажнунтолга солдим кўз.  
У эса ҳали-ҳамон,  
Турарди айтмай бир сўз.”

Болалар учун асар ёзувчи ижодкорлар сафи кўп эмас. Жаҳон адабиётининг азалий кемтик жойи шу. Мадианобону эса ана шу адабиётнинг умидли вакили сифатида кириб келмоқда. Бу йўлда унга муваффақият тилаймиз.

**Jomboy tongi**

©МУАССИС:  
«Jomboy tongi» gazetasi tahririyati  
masъuliyati cheklangan jamiyati

Бир ойда тўрт  
марта чоп этилади

**Мухаррир:**  
Исомиддин ПЎЛАТОВ

Газета Самарақанд вилоят  
матбуот ва ахборот  
бошқармасида  
06.02.2017 йилда 09-19 рақами  
билан рўйхатга олинган.  
Индекс: 436  
Баҳоси келишилган  
нарҳда.

**Манзил:**

140400, Жомбой шаҳри, Арчазор хиёбони,  
13-уй. Телефонлар: 475-27-00, 475-27-38.

Газета «Noshir lyuks» МЧЖ босмаҳонасида офсет  
усулида чоп этилди.  
Босмаҳона манзили: Самарқанд шаҳри,  
Спитамен кўчаси, 270-уй.  
Нашр индекси: 5521  
Босишга топширилган вақти: 15.01.2021 йил.  
Адади: 2680 дона Буюртма №  
Jomboy\_tongi@umail.uz www.jomboytongi.uz

**Навбатчи:**  
Ш.Исоқулов

ISSN 2010-9059



9 772010 905903